

四川通志卷三十一

輿地志 三十

津梁

一

周禮司險知山澤之阻而達其道路萍氏又有川
遊之禁夏令曰十月成梁孟子以此爲王政之首
蓋山險可踰水險難越津梁之設所以濟萬民而
通四方也爾雅曰析木謂之津天文志云梁爲天
橋舟星曰天船上應星象昭然可覩說文曰津水
渡也橋水梁也爾雅隄謂之梁石橋也石杠謂之

猗亦石橋也廣志云獨木之橋曰權曰狃卽今之
畧狃也至橋梁所不能設則以舟通之因地制宜
凡往來行旅寧有濡足滅頂之虞歟

聖朝六合爲家八荒在闡會萬方之琛賁通重譯之梯
航而蜀地岷江導源支分派別津梁之道通於絕
徼巨梁則國工修之餘則飭令有司隨時修葺以
至鐵絙石柱之險阻繩行沙度之荒遠車書輻輳
皆履若坦途況石梁所通方舟所濟有不熙來攘
往共欣利涉者乎志津梁

成都府

成都縣

附郭

金花橋在縣西四里一名市橋

後漢書公孫述傳述募取死士五千

餘人以配延岑於市橋僞建旗幟鳴鼓挑戰而潛遣奇兵出吳漢軍後襲擊破漢漢墮水緣馬尾得出吳漢傳漢進軍攻廣都拔之遣輕騎燒成都市橋注云市橋卽七星橋之一橋也華陽國志城西南石牛門曰市橋下有石犀潛淵中水經注吳漢自廣都乘勝進逼成都與其副劉尙夾江爲營浮橋相對公孫述使謝豐揚軍市橋出漢後襲破漢李膺益州記冲星橋舊市橋也在今成都縣西南四里寰宇記市在橋南因名市橋城中衛大街卽市橋也

昇仙橋在縣北十里

華陽國志城北十里有昇仙橋司馬相如東游題其柱曰

不乘駟馬赤車不過汝下故亦名駟馬橋按水經
注寰宇記作昇遷附唐無名氏題橋賦昔蜀郡之
司馬相如指長安兮將離所居意氣而登橋有感
沈吟而命筆爰書倘竝遷鶯將欲誇其名姓非乘
駟馬誓不還於里閭原夫別騎畱連鄉心願望銅
梁杳杳以橫翠錦水翩翩而逆浪徘徊浮柱之側
睥睨長虹之上神催下筆俄聞風雨之聲影落中
流已動龍蛇之狀觀者紛紛嗟其不羣染翰而含
情自負揮毫而縱意成文渥澤尙遙滴瀝空瞻於
垂露翻飛未及離披且覩其崩雲蓋以立誓無疑
傳芳不朽人材旣計其獨出富貴應知其自有潛
生肝鬢之心暗契縱橫之手於是名垂要路價重
仙橋離離迥出一一高標參差鳥跡之文旁鄰綵
檻踴躍鵬搏之勢下視丹青旣而玉壘經過金門
寵異方陪侍從之列忽奉西南之使乘輅電逝於
遐方建節風生於舊地結構如故高低可記追尋
往跡先知今日之榮拂拭輕塵宛是昔時之字想
夫危梁蘚剝清墨蟲穿長含氣象久滯風煙幾遭

凡目之見嗤徒云率爾終俟瓌姿之後至始覺昭
然所謂題記數行寂寥千載何擲管而無感如合
符而終在驚後起而慕前賢亦丁寧而有待唐盧
照鄰對蜀父老問龍集荒落律紀獐賓余自鄧錡
歸於五津從王事也丁丑居於昇仙橋止送客亭
卽相如所謂不乘高車駟馬不出汝下者也遇蜀
父老皤然龐眉華髮者休於斯謂余曰子非衣冕
之族歟文章之徒歟飾仁義以干時乎懷詩書以
邀名乎吾聞諸夫子曰邦有道貧且賤焉恥也常
今萬方日朗九有風靡主上垂衣裳正南面而已
矣庸非有道乎而子爵不登上筵位不至中涓黎
羹不厭裋褐不全庸非貧賤乎吾視子形容顛顛
顏色疲怠心若涉六經眼若營四海何其無恥也
何其不一干聖主効智出奇何棲棲默默自苦若
斯吾聞克爲卿失則烹何故區區冗冗無所成名
余笑而應之曰井魚不可以語於海者拘於墟也
夏蟲不可以語於冰者篤於時也蓋聞智者不肖
時而徼幸明者不違道以干非是以聖賢馳騫莫

救三家之徹匹夫高抗不屈萬乘之威道在則簞
瓢匪陋義存則珪組斯違或立談以邀鼎食或白
首而甘布衣或委輅而仕屬論都之會或射鈞以
相遇匡霸之機亦有朝爲伊周暮爲桀跖當其時
也襲珩佩之鏘鏘失其時也委溝渠而喀喀故使
龍邱先生羞聞擁篲雁門太守不如縫掖孟軻偃
蹇爲王者師范雎匍匐爲諸侯客富貴者君子之
餘事仁義者賢達之常迹來不可違類鴻雁之隨
陽去不可畱同白駒之過隙行蘇張之辯于媯燧
之年則迂矣用韓彭之術于堯舜之朝則舛矣守
夷齊之節於湯武之時則孤矣抱申商之法於成
康之日則愚矣彼一時也此一時也易時而處失
其所矣大唐之有天下也出入三代五十餘載月
竈來庭風邱欸塞華旌已偃羽檄已平雖有廉白
之將孫吳之兵百勝無遺策千里不畱行無所用
也社首旣禪介邱旣封創明堂立辟雍雖有闕里
之聖淹中之儒叔孫通之薊公玉帶之圖將焉設
也咸英竝作韶武畢用奏之方澤而地祇登昇之

園邱而天神降雖有伶倫伯夔延陵子期操雅曲
則風雲動激棲音則草木悲又何施也畫衣莫犯
囹圄不修雖有臯陶仲甫之器釋之定國之儔金
科在握丹筆如流非急務也人歸東戶家沐南薰
山澤無蹊隧雞犬不相聞雖有文翁黃霸之述職
子游子賤之弦歌政成禮讓俗被雍和固無取也
干戈已戢禮樂已興刑罰已措梁父已昇公卿常
伯庶政其凝雖有鴻才大畧麗句豐詞發言盈乎
百代濡翰周乎四時畧無益於今日而適足以拂
之是故天子恭己羣臣演成攘袂而凌稷卨撫掌
而笑阿衡無爲而萬物皆遂不言而品彙咸亨莫
不稱贊鴻烈揄揚頌聲言殊者招累行危者相傾
効智者輟談於草澤出奇者裹足於山楹許由去
而堯臣不少善卷逃而舜德不輕夫周冕雖華後
猴不之好也夏屋雖崇騏驎不之處也載鼙以車
馬不如放之於藪穴也樂鷄以鐘鼓不如棲之以
深林也此數物者豈惡榮而好辱哉蓋不失其天
真也若余者十五而志於學四十而無聞焉詠義

皇之化翫姬孔之編周遊幾萬里馳騁數十年時
復陵霞汎月擗管彈弦隨時上下與俗推遷門有
張公之霧突無墨子之煙雖吾道之窮矣夫何妨
乎浩然今將授子以中和之樂申子以封禪之篇
終眇慙乎指地竊所慕於談天於是蜀父老再拜
而謝曰鄙夫瞽陋長自愚惑習俗遐陋不遊上國
聞王人之休音聽皇猷之允塞亦猶獻雉而過司
南銜龍而光有北請終餘論永告功契唐岑參昇
仙橋詩長橋題柱去猶是未達時及乘駟馬車却
從橋上歸名共東流水滔滔無盡期羅隱詩危梁
枕路岐馬駐門前時價白友朋得名因婦女知直
須論命運不得逞文詞執戟君卿里榮華竟若爲
五代江遵詩漢朝卿相盡風雲司馬題橋衆所聞
何事不如楊得意解搜賢哲薦明君題橋貴欲露
先誠此日人皆笑率情應訝臨邛沽酒客逢時還
作漢公卿宋陸游詩早過昇仙不暇炊橋邊買餅
療朝饑紛紛滿座誰能識大似新豐獨酌時熨手
金鞭天馬駒冰河雪谷笑談無只言燕趙多奇士

豈必書生盡腐儒橋邊沙水綠蒲老原上煙蕪黃
犢閑老子真成興不淺憑鞭歸夢遶家山元虞集
詩我到成都住五日駟馬橋下春水生過江相送
荷子意還鄉不畱非我情鷓鴣輕筏下溪足鸚鵡
小窗呼客名賴得鄆筒酒易醉夜深衝雨漢州城

清遠橋在縣北唐光啟三年王建攻成都田令孜

登樓慰諭建與諸將羅拜於清遠橋

此即此三省

謂清遠橋在府南太元樓前誤附宋京鑑記出成都城不百步有橋舊名清遠凡有他道來成都者必經焉清獻趙公所編成都集記最爲精詳余因究清遠得名之自則成都府有橋七謂象應七星獨清遠不與及究司馬長卿題柱之所名昇仙者迺在數然其說謂當在上流五里今之名昇仙者在下流七集記已疑其非古矣余謂長卿負飄飄凌雲游天地之意氣發軔趨長安時欲與蜀山川泄

其不平其操筆人書當於萬目睽睽之地決不在
此况象應七星之義必其屈曲遼屬不應昇仙獨
與他橋相遼絕陵谷有變移冊牘有缺逸竊意近
時之清遠卽昔年之昇仙不然九達之衝百堞之
旁一杠梁如此反不載於成都集記何耶集記作
於國朝使清遠之名果得於古清獻公豈肯畧之
於簡編之外余久欲訂正之而無其因先是橋隸
邑尉邑尉多苟且追責疊石編木工不精良不惟
簡陋視會府不稱歲久石且泐木且折勢將圯敗
過者病焉迺於農隙水涸時撤而新之取長卿題
柱之語扁以駟馬因去清遠不經之名記其辯也
不廢昇仙相仍之地存其疑也或曰是則然矣無
亦以貴富期待蜀士耶曰余何敢淺蜀士余所期
待又在貴富外名當傳信稽事考迹曰駟馬爲宜
粵自六丁開蜀參井岷峩之英靈恥秦不文德不
忍度劍關者百七十有餘年至漢文翁守蜀始振
發之長卿實鍾其英靈者首入帝京以雄麗溫雅
之文動萬乘震一時其後蜀土接軫以進者皆長

卿敝其荒議功爲文翁亞文翁創興之學長卿經行之橋事雖不侔迹皆不當蕪沒余來成都學官欵傾欲壓已改築棟宇人謂自成均而下無此壯觀似足以侈文翁化俗之萬分茲建橋以駟馬名自是長卿之遺踪亦不泯矣若曰長卿非全德不爲蜀士所多則非余訪古名橋之意也橋石其址以釃水如堆阜者三屋其背以障風雨如樓觀十有五楹板其虛距江底高二十有二尺其修十有七丈其廣二丈贊南北兩溪以禦衝決翼東西兩亭以便登覽經始於故歲十二月之戊戌告具於今歲四月之庚辰是役也取餘於公帑則民不知擾責成於寮案則官無妄費易名以辯千古之疑則所傳或不朽持是以紀於石尙庶幾無媿辭云

按京仲遠記清遠橋卽今之駟馬橋

冲治橋在縣西

華陽國志直西門郾江上曰冲治橋從冲治橋西出口長昇橋郾江

上西有永平橋又成都西南兩江有七橋長老傳言李冰造七橋上應七星故世祖謂吳漢曰安軍

宜在七橋連星間李膺益州記一長星橋今名萬里二員星橋今名安樂三璣星橋今名建昌四夷星橋今名竿橋五尾星橋今名禪尼六冲星橋今名永平七曲星橋今名昇仙按李膺記與華陽國志多不同華陽國志昇仙橋亦不在七星之數又水經注作冲里橋

浣花橋在縣西門外

竿橋在縣西南四里

晉書永和三年桓溫攻成都與李勢戰於竿橋華陽國志

萬里橋西上曰夷星橋亦曰竿橋寰宇記以竹索爲之桓溫討李勢陳兵於此附宋陸游詩浣花之東當竿橋犇流鬻橋橋爲搖分洪初疑兩蛟舞觸石散作千珠跳壯聲每挾雷雨橫巨勢潛借黿鼉驕夢回聞之坐太息鐵衣何日東征遼銜枚度磧沙颯颯槃槃斷隴風蕭蕭不然投檄徑歸去短篷卧聽錢塘潮

普濟橋在昇仙橋左

寶蓮橋蜀府遵義門前

青羊橋在縣西南

廣福橋在縣北三十五里

建昌橋在縣西南

竹箐橋在縣西四里

金泉橋在縣西十五里

遇仙橋青羊宮左

舊浣花橋青羊宮右

蕭公橋舊藩金水河西蕭公廟左

華陽縣

附郭

金津橋在縣東門內下蓮池

金水橋在縣東門內

錦江橋在縣東錦江街

龜化橋在縣南金水河東俗呼青石橋

普安橋在縣東水津街

流芳橋在縣東黃水河

濯錦橋在縣東門外

不周在縣東門外乾隆
閒知縣安洪德建

萬里橋在縣南門外

元和志萬里橋架大江水在縣南八里又唐明皇幸蜀過

此問橋名左右對以萬里明皇嘆曰開元末僧一行謂更二十年朕當遠遊萬里外此其驗也寰宇

記亦名篤泉橋以橋南有篤泉也孔明於此餞費禕聘吳禕嘆曰萬里之行始於此矣橋因以名華

陽國志城南江橋曰萬里橋橋高三丈寬半之長十餘丈兵燹後頽圯康熙五年重修附宋劉光祖

記維蜀慕王化通中國最爲古遠載籍之傳尙矣至周武王牧野之誓史官書之曰庸蜀羌髻微盧

彭濮人則其附聲教識仁暴概見於經矣獨秦見伐資以取楚儀錯之爭是也而儀城具存至今自

秦置守李冰通二渠爲蜀萬世利今萬里橋之水蓋秦渠也是則蜀號陸海蕭何藉之以基漢漢興

五六十載文翁守蜀始取蜀秀民立學官教之學比齊魯而司馬相如之文遂擅天下晚有揚雄氏

續孟荀之絃於漢之旣衰漢祀中絕公孫述竊據蜀蜀人以死抗述者班班風節又凜乎東津之首

也其後諸葛孔明用蜀以仁義公信懷而服之法
度修明禮樂幾於可復夫歷周秦兩漢千有餘年
孔明而以蜀通吳抗魏三分天下存漢社稷雖號
霸業實宣王風蓋孔明學探伊傳而跡竝管樂蜀
人到今矜而誦之不忘今羅城南門外笮橋之東
七星橋之一曰長星橋者古今相傳孔明於此送
吳使張溫曰此水下至揚州萬里後因以名或則
曰費禕聘吳孔明送之至此曰萬里之道從此始
也孔明沒又千載橋之遺跡亦粗具非有所甚壯
麗偉觀也以千載之間人事幾更興廢而橋獨以
孔明故傳之亡窮其說雖殊名橋之義則一厥今
天下兼有吳蜀朝廷命帥其遠萬里蓋受孔明之
任以來由蜀走闕道亦如之其於橋孰不懷古以
圖今追孔明之道德勲庸而思髣髴其行事侍御
趙公之鎮蜀也始至謁古柏祠卽命葺之明年作
祠廟於其故營又明年新其故宅廟貌每曰諸葛
公三代遺才也用法而人不怨任政而主不疑非
天下之至公其孰能與於此今其遺跡所存尙多